

26. januar 2015

UPA2015/58

Inatsisartut suleriaasiat § 33 immikkoortoq 1 naapertorlugu matumuuna inatsisartunut aalajangiiffigisassatut siunnersuut imaattoq saqqummiuppara:

Inatsisit attuumassuteqartut allanngortinneqarnissaannut siunnersuummik UPA 2016-imut Naalackersuisut suliniuteqaqqullugit peqquneqarnissaat pillugu Inatsisartut aalajangiiffigisassaattut siunnersuut, taamaaliornikkut inoqutigiit 400.000 kr.-t ataallugit isertitallit napparsimasut angerlarsimaffianni nerisaqarnermut ineqarnermullu akiliuteqartarunnaarsinnaaqqullugit.

(Inatsisartunut ilaasortaq Anthon Frederiksen, Partii Naleraq)

Tungavilersuut:

Ajoraluartumik inuit ilaat nappaammik eqqorneqartarput nunatsinni katsorsarneqarsinnaanngitsumik.

Taamaattoqartillugulu napparsimasup amerlanertigut danmarkimut katsorsartikiartornermini qaniginerpaasami ilaat assut pisariaqartittarpaat.

Tamannalumi ataasianngeqaluta inimi maani siusinnerusukkut eqqartortarsimavarput, kisianni suli maannamut inunnut pineqartunut naammaginartumik aaqqiissuteqartoqanngilaq.

Siunnersuut manna saqqummiuppara, inuit maannamut arlallit aamma nammineerlutik danmarkimi katsorsartittarnerminnik misigisartakaminnik oqaluttuartarnerat tungavigalugu.

Inuit pineqartut, tassaasarpur kræftimik, tartulunnermik allamilluunniit nunatsinni katsorsarneqarsinnaanngitsumik napparsimalersimasut. Taakku amerlanertigut napparsimalersimanertik pissutigalugu suliffitsik annaasarpaat, taamaalillutillu akiligassanut assigiinngitsunut isertitaqannginnertik pissutigalugu akissaaruttarlutik.

Taamaattoqartillugu kommunimut isumaginninnikkut periarfissat aamma ilaatigut ajornaatsuinnaanngitsut ilungersuutigeqqaarlugit ikiorsiinerit pisarput, inummut napparsimasumut nappaammik naalliuuteqareersumut annertunerusumik oqimaatsorsiornermik kinguneqartarmik.

Taama erloqissuteqarnerup saniatigut napparsimasup qaniginerpaasani, oqimaatsorsiornermi nalaani nakooqutiginiarlugu taassuma (aappaasup, ilaqutaasorluunniit alla) aamma suliffimmini amerlanertigut suliunnaarallartariaqartarput, taamaalillunilu aningaasaqarnerup tungaatigut ilaqutariit annertunerusumik ajornartorsiuteqalertarlutik.

Tamatuma kingunerisaanik aningaasaqarnikkut pissuteqartumik toqqissisimannginnerup kingunerikkajuttarpaa, napparsimasoq kisimi pinnani nappaatigisap saniatigut napparsimasup ilaqutai tamarmik erloqinermik eqqorneqartarlutik, tamatumalu saniatigut aningaasaqarniarnerup kingunerisaanik ajornartorsiutinik eqqorneqartarlutik.

Taamaattumik inuit nappaammik eqqorneqarsimasut ilaqutaasa annertuumik erloqisuteqareersut minnerpaamik angalanerinut, najugaqarnerinut nerisaqarnerinullu akiliunneqartarnissaat Partii Naleqqamiit siunnersuutigaarput.

Peqqinnissaqarfiup sullississutai pillugit Inatsisartut Peqqussutaata allangortinnerata saniatigut pisortat ikiorsiissutaat pillugu Inatsisartut Peqqussutaat allangortinneqarnissaa eqqarsaatigineqartariaqartoq isumaqarpugut, tassungalu atatillugu Partii Naleqqamiit isumaqarpugut kommuninik suleqateqarnermi misilittakkat atorluarneqarsinnaasut.

§ 37 naapertorlugu apeqquteqaatinnut nr. 2014/197-imut akissutigineqartumi ilisimatitsissutigineqarpoq napparsimasup aapparisaata inooqataaluunniit ineeqqami unnueqataanera 400 kr.-inik akeqartoq, akimut ilaalluni aserfallatsaaliinermut, eqqiaanermut immikkut siniffiliinermut nerisaqarnermullu aningaasartuutit. Aammali eqqarsaatigineqartariaqarpoq napparsimasup ilaqtaminik najorteqarnera napparsimasumut iluaqutaaginnarani aamma napparsimasup nakkutigineqarneranut ikiorneqarneranullu ilaqutaasut peqqinnissaqarfimmu aningaassartuutaanngitsumik suleqataalluarterneri.

Taamaattumik Partii Naleqqamiit partiit allat inussiarnersumik qinnuigaagut siunnersuummik paasinnilluarlutik tapersiiumaartut.

Siunnersuutip aningaasatigut kingunerisassai:

Partii Naleqqamiit periarfissaqanngilagut siunnersuutip aningaasatigut kingunerisinaasai sukumiinerusumik paasiniassallugit, kisianni § 37 naapertorlugu apeqquteqaammi oqaatigineqarpoq danmarkimi ineqartitsisarnermi aningaasat ukiumut 1,2 mio. kr-nit isertinneqartartut. Taamaattumik aningaasartuutit annerpaamik taama annertussuseqarnerat naatsorsuutigineqartariaqarpoq.

Akerlianilli malittarisassat allangortinneqarnerisigut naatsorsuutigineqartariaqarpoq allaffissornikkut aningaasartuutinik sipaaruteqartoqarnissaa, taamaaliornikkut innuttaasut akissakinnerusut unnuinermut akiliisarunnaassagaluar mata. Isertitanit taakkunannga qanoq amerlatigisut kommunit isumaginninnermut ikiorsiissutaannit pisarnersut ersarinngilaq, misissuinerlu tamanna nutarterinermut ilanngunneqartariaqarpoq.

Siunnersuutip allaffissornikkut kingunerisassai:

Inatsisip nutarterneqarnerani ukiumut aningaasartuutissat 1/8-liisa missaat 125.000 kr.-inik naleqarnissaa naatsorsuutigineqartariaqarpoq, nutserineq ilanngullugu. Taamatuttaa q siunissami allaffissornikkut sipaaruteqarnissaa anguneqarsinnaavoq.